

# MEJE PO CARTE COTACAYA PEDRO TATINA, POMONAE JESUCRISTO PEJUME COWŨNTSIWI TATINATSI

---

Meje yabara poxonae Pedro tamropata pitaba xua tatina pomonaetha pomonae Jesucristo pejume cowŭntsiwichi

**1** <sup>1</sup>Xan, Simón Pedro, pon Jesucristo amanaya tanacuitan. Xan ponxaein Jesucristo pia peitorobi jiwi jiwana tatsin. Pacata tinatsi barapo carte painya nexeiñae xua pejume cowŭntsiwa Jesucristo xua bichocono wŭnae icha paxan paichin. Barapo pejume cowŭntsi coyenewa Nacom werena pichapa, pon bichocono pejuñtu coyene xanepanaewa pexeinaein. Yawano barapo pejume cowŭntsi coyenewa Jesucristo werena pichapa pon iru bichocono pejuñtu coyene xanepanaewa pexeinaein. Bapon jiwi Pecapanenebiyaein abe pia peexanae cuiru coyenein weya. <sup>2</sup>Barabu Nacom paca yawenaena pia paca necaantobexae. Yawano barabu Nacom paca catsina juñtema pejinompae coyenewa. Barabu barapo naxobe coyenewabe bichocono paxeinaponaename xua poxonae payabara yaputaeponaename Nacom xuano xua payabara yaputaeponaename Jesucristo pon Wanacanamataxeinaein.

Meje yabara pocotsi coyenewano bewa exanaena Cristo piamonae tatsi

<sup>3</sup>Nacom naca cata daxita pocotsiwa nantawenonatsi xua juñtema wajinompaewanexa yawa xua xanepanaya wajinompaenexa Nacom nexa. Daxita baxuan Nacom naca cata pia peayapusu itorobi coyenewatha. Poxonae yabara yaputaeponaeinchi Nacom, nacuidubatsi xua bapon naca waba xua iru waxeinaenexa peainya cui coyenewa, xuano xua iru waxeinaenexa Nacom pia pexeinya peexanae coyenewa. <sup>4</sup>Poxonae Nacom naca cata pia peainya cui coyenewa, yawano pia pexeinya peexanae

coyewea bapoxonae nama naca cata pia peyabara naca tsiwūnae muxu dutsiwan. Nacom pia peyabara naca tsiwūnae muxu dutsiwan bichocono ainya cui xua jiwi jopa itacūpaetsi xua pecomotsiwa. Barapo peyabara naca tsiwūnae muxu dutsiwan painya necacatsixae anoxuae paxeiname xua Nacom pia peajuntūyapusūwa xua jopa weraweracaeyo. Yawano barapo peyabara naca tsiwūnae muxu dutsiwan painya nexeiaexae paca itacūpa xua papanenebiyam abe painya neexanae cuiru coyewea weya xua barapo cae pin nacuathepiwi po coyene ichichipa abe exana. <sup>5-7</sup>Bequein pajume cowūntame ichitha panantawenoname xua muxuna paexaname xua beta painya nejinompae coyewewan. Poxonae beta pajinompame, bapoxonae panantawenoname xua muxuna paexaname xua Nacom payabara yaputaneme. Poxonae Nacom payabara yaputaneme, bapoxonae panantawenoname xua muxuna paexaname xua painya coutha pana nenajuntū coyene itorobiwam. Poxonae painya coutha pana najuntū coyene itorobame, bapoxonae panantawenoname xua muxuna paexaname xua jūntema pajinompame bequein ichamonae abe pacata exana. Poxonae jūntema pajinompame xua bequein ichamonae abe pacata exana, bapoxonae panantawenoname xua muxuna paexaname xua paantobeya jinompame Nacom. Poxonae paantobeya jinompame Nacom bapoxonae panantawenoname xua muxuna paexaname xua paantobem pomonae pejume cowūntsiwi Jesucristo. Poxonae paantobem pomonae pejume cowūntsiwi Jesucristo, bapoxonae panantawenoname xua muxuna paexaname xua paantobem daxita jiwi.

<sup>8</sup>Icha paxeiname daxita barapo coyewewan yawa xua paexanaponame daxita baxuan bapoxonae beta painya neexanae jiwi pam tsane Nacom nexa. Yawano beta payabara yaputaneme Jesucristo pon Wanacanamataxeinaein. <sup>9</sup>Ichitha icha pebin jopa yabara exanaeyo barapo coyenein, bapon be pon naita tsaqueta poxoru jopa ichipaeyo xua peyabara yaputaewa barapo coyene. Daxota bapon jūntemaina xua bayatha wejūntemaina exanatsi abe pia peexanae cuiru coyewewan tatsi xua Nacom wejūntemaina exana. <sup>10</sup>Tamonae pam paxam pomonae be tayapin jiwi tapaca canatsicotae jiwichi pam irurū painya nejume cowūntsixae Jesucristo. Daxota paca tsipaebatsi xua xaniwaicha pana naexande xua daxota patsita itūtsiname xua paxam pomonae Nacom pia pewabiwi tatsi jiwana pam. Yawano paxam pomonae Nacom pia peitapetsiwi tatsi jiwana pam. Poxonae baxuan paexanaponaename jopa equeicha abe paexanaem tsane po coyene xua daxota paitawetame Nacom. <sup>11</sup>Bapoxonae Nacom bara paca matenta weiweinaya copata xua painya nepatsinexa tsane Nacom pia peitorobi nacua beicha tatsi. Nacom pia peitorobi nacua ataya ayapusū tsoponae ichaxota Jesucristo jiwi itorobiya ewatatsi, pon Wanacanamataxeinaein, xua pon Pecapanenebiyaein jiwi.

<sup>12</sup>Bequein baxua bayatha payaputaneme, ichitha equeicha paca tsipaebatsi xua jopa painya jüntemainaenexa. Anoxuae paxam ajüntayapusüya pajume cowuntame pexainyei jume Jesucristo yabara. <sup>13</sup>Poxonae cataunxuae poponan yabara nanta xeinan xua ainya cui xua baxuan yabara tapata catsipaebiwa tsainchi. <sup>14</sup>Yaputan tsipei Jesucristo, pon Wanacanamataxeinaein, netsipaeba xua bara nama imoxoyo tupaein. <sup>15</sup>Daxota xaniwaicha pacata tinatsi xua baxuan jopa yabara painya nejüntemainaewa tsane poxonae tupaein. Bapoxonae bexa tsane pana necui yabara jüntanainaename pocotsiwan yabara paca tsiwünae muxu dutatsi.

**Meje yabara xua pomonae tane Cristo pia peainya cui coyenewa tatsi**

<sup>16</sup>Poxonae paxan paca tsipaebatsi Jesucristo pia peayapusü itorobi coyenewatha yawano xua pepatopeicaewa yabara pon Wanacanamataxeinaein, apara jopa paca tsipaebichi po diwesi pejemai diwesi po diwesi xua saya jiwi paeba. Bara pana natan Jesucristo pia pexeinya peitupanae coicha tatsi pon jiwi Pecanamataxeinaein. <sup>17</sup>Pana natan poxonae Jesucristo ainya cui exanatsi xua Nacom Pexanto ainya cui exana, pon Jesucristo Paxa tatsi. Yawa pana natan xua Nacom Pexanto cata pexeinya peitupanae coicha. Bapoxonae Nacom pejume pajume tan pexeinya peayapusü jume, jeye: “Bapon apara Taxanto, pon bichocono antobein, pon itapetan. Bapon bichocono nejüntü coyene weiweina exana”, jei Nacom. <sup>18</sup>Paxan baxua pajume tan xua Nacom cueicueijei peitaboco wetsica poxonae Jesucristo pon jiwi Pecanamataxeinaein demxuwatha pana nebaru pona po demxuwa ichaxota Nacom cueicueijei itaboco wetsica.

<sup>19</sup>Daxita baxuan naca yawena po diwesi xua Nacom pia peitorobi jume pepaebiwi tina xua barapo diwesi pexainyei jume diwesi. Pajume naitaeware pocotsiwan xua barapomonae paeba, beya poxonae yatsicaewa payaputaename pocotsiwa barapomonae paeba. Barapo pejumein jume xanepana. Bichocono naca yawena icha pecoicha ichi xua pentha exana poxonae quirei xua ba naca yawena. Barapo pecoicha waxainchi jopa nantawenonaetsi poxonae jarawato ecoina xuano poxonae matabi pentha tsina. Barichi poxonae Jesucristo patopaetsica jopa cana matawenonae tsainchi barapo diwesi tsipei bayatha patopeicaena Jesucristo. <sup>20</sup>Matha copiya bewa payaputaem xua meje: Nacom pia peitorobi jume diwesi dapo jumein aibi pocotsiwa pia coya ichichipa paeba barapo Nacom pia peitorobi jume pepaebiwi. <sup>21</sup>Tsipei Nacom pia peitorobi jume pepaebiwi jopa cueicueijeyi pocotsiwa ichichipa pia coutha paeba xua poxonae tina Nacom Pejume Diwesi. Ichitha barapomonae tatina pocotsiwa Nacom ichichipa, xua Nacom pia Pejumope tünaxü tatsi peitorobixae.

**Meje yabara xua pomonae naerabiya pecuidubi jiwi**

**2** <sup>1</sup>Caena bayatha israelmonae jiwana jinompa pomonae naerabiya peitorobi jume diwesi pepaebiwi. Barichi painya xantha patsina pomonae naerabiya pecuidubi jiwi. Barapomonae cuidubina po diwesiin xua paca weraweraca exanaena. Barapomonae nameicha nacuita xua naerabiya paca cuiduba. Pon jiwi pia Pecanamataxeinaeinchi pon Jesucristo, barapomonae itawetsinchi xua Jesucristo itawetsina, pon xua bayatha barapomonae tsitupatsi. Nacom nainya weraweraca exanaena barapomonae, abe peexanaexae. <sup>2</sup>Pin bicheitomonae exanaena xua abe exana pocotsiwa xua barapomonae cuiduba pomonae naerabiya pecuidubi jiwi. Barapomonae pomonae naerabiya pecuidubi jiwi naerabiya pecuidubixae tsane pin bicheito abe yabara paebiya exanaena pocotsiwa Nacom pia pexainyei jume diwesi tatsi. <sup>3</sup>Barapomonae paca muxuitorobina nawita, yawano paca itorobina xua painyamonaean amanaya paitorobiname pedoutsinexa paratixi barapomonaetha pomonae naerabiya pecuidubi jiwi. Ichitha caena bayatha Nacom yabara paeba barapomonae, jeye: “Barapomonae bichocono abe peexanae jiwi, daxota bewa werapaena tsipei bichocono abe peexanaexae”, jei Nacom.

<sup>4</sup>Nacom bayatha jopa yabara jüntemainaeyo po peabe coyenewan matatsunpiwi exana. Ichitha Nacom bebai ichaxota be pucua xua isoto xua jopa itacounaiyo. Yawano Nacom napenta exana peita quirei nacuatha beya poxonae barapo matatsunpiwi umenaena Nacom peitabaratha poxonae po mataqueitha Nacom yabara paebina daxita jiwi xua penatsicuentisiwa xua abe peexanaexae. <sup>5</sup>Barichi Nacom jopa bayatha yabara jüntemainaeyo po peabe coyenewa jiwi exana pomonae caena bayatha jinompa. Barapo matakabintha Nacom itoroba pin awubo xua bunothopa peexanaenexa pomonae abe peexanae jiwi. Meisa saya Noé iruno piamonae tatsi xua siete poyobe tatsi daxita barapoyobe capanenebiyatsi barapo awubotha. Barapon Noé cuiduba jiwitha xua jiwi bewa jüntu coyene xanepanaya jinompaena Nacomtha. <sup>6</sup>Pomonae Sodoma tomarapiwi iruno Gomorra tomarapiwino, barapomonae abe peexanaewi. Barapo tomarabemonae yawa tomarabe Nacom yabara paeba xua pinae abe exana daxota Nacom weraweraca exana isototha beya poxonae daxita saya u ipunan naexana. Barapo coyenein Nacom tsita ituta xua bapon bexa jupa exanaena pomonaeintha pomonae abe exana dubenanaebiya. <sup>7</sup>Ichitha meisa saya Nacom capanepa barapo pin isoto weya pon pewun Lot. Bapon Lot pejuntu coyene xanepanaein Nacomtha. Lot cuitaya unthuthu deideijej peocotsiwa jiwi abe exana.

<sup>8</sup>Bapon Lot, pon pejuntu coyene xanepanaein Nacomtha, baru popona pomonae peajuntucoyenebe jiwi. Daxita matabi bapon bichocono anthuthutane xua pejuntu coyene xanepanaexae Nacomtha

xua poxonae bapon taiba yawano xua poxonae jume taiba xua jiwi  
 abe exaneiba. <sup>9</sup>Ichitha Nacom pon jiwi Pecanamataxeinaein yaputane  
 xua peyawenaewa pomonae peantobewixaetsi poxonae barapomonae  
 bichocono juntu coyene jujuteibatsi caurimonae pia pentacaponaein  
 tatsi. Yawano Nacom yaputane xua atene peexanaewa pomonaetha  
 pomonae jopa pejume cowantsiwichi. Nacom baxua exanaena beya abu  
 poxonae barapomonae umenaena Nacom peitabaratha poxonae Nacom  
 yabara paebina daxita jiwi xua penatsicuentisiwa xua abe peexanaexae.  
<sup>10</sup>Pomonae xua abe exana pocotsiwa xua saya jiwi ichichipa exana  
 yawano aichaxaibi exana pocotsiwa pon jiwi Pecanamataxeinaein itoroba  
 daxita barapomonae Nacom atene exanaena. Barapomonae bichocono  
 atsaca yawa ichamonae aebatsino. Jopa junuwiyo xua abe peyabara  
 paebiwa xua matatsunpiwi abe peyabara paewatsi. <sup>11</sup>Matatsunpiwi  
 xeina peayapuswa yawano xeina peitorobi coyenewa xua beyacaincha  
 pomonae naerabiya pecuidubi jiwi. Ichitha barapo matatsunpiwi jopa  
 abe yabara paebiyo xua barapomonae pomonae naerabiya pecuidubi jiwi  
 poxonae barapo matatsunpiwi cueicueije tsmenae Nacom peitabara  
 tatsi, pon jiwi Pecanamataxeinaein.

<sup>12</sup>Barapomonae pomonae abe peyabara paebi jiwi, barapomonae exana  
 xua icha duwei ichi, xua duwei ba jopa beta nanta xeinaeyo, xua ba  
 saya jiwi tsicobe naexanatsi xua jiwi peteicaenexa yawa pebexubinexa  
 pexaenexa. Barapo pebiwi abe yabara paeba pocotsiwa jopa yaputaeyo.  
 Barapomonae werapaena pia abewantha icha duwei icha xua werapa.

<sup>13</sup>Barapomonae xuya atene tsane abe peexanaexae ichamonaetha.  
 Barapomonae jopa auriyo xua abe peexanaewa mataqueitha.  
 Barapomonae paca muxutoroba abe peexanaexae bequein naxaiba  
 poxonae pin penabanaewan paexaneibame. Ichamonae paca abe yabara  
 paeba abe peexanaexae barapomonae yawa aura paca necaexanaexae.

<sup>14</sup>Barapomonae ichichipa nawita xua peyacaibiwa yabuxi daxita  
 xua powaxi taiba. Jopa juniya abe eexanaponaeyo xua abe exana.  
 Barapomonae nantauta pia pepuna ponaewichi pomonae pejuntu coyene  
 faefaenaewi Nacomtha. Barapomonae ichichi xeica nawita pocotsiwan  
 xua tane daxita. Barapomonae yacuiya naexana xua abe peexanaewa.  
 Daxota barapomonae Nacom bichocono atene cana exanaena.

<sup>15</sup>Barapomonae jopa Nacom yabara yaputaetsi pejume naitematsixae po  
 coyene xua Nacom pejuntu coyene xanepana exanaewa barapomonae.  
 Barapomonae barapo canauta jutsiya eexanapona icha Balaam ichi xua  
 pocotsiwa exana. Bapon caena bayatha popona. Bapon Balaam, Beor  
 pexanto tatsi. Bapon Balaam abe exana pexeinaenexa paratixi. <sup>16</sup>Balaam  
 pon naerabiya peitorobi jume diwesi pepaebin, poxonae ichichipa abe  
 peexanaewa, cui matawentatsi xua abe exana. Po duwein pewun burra,  
 bapon cui matawenta, Balaam cui matawentatsi. Burra cueicueije icha

jiton ichi, xua saya jiton cueicueije. Barapo duwein jopa copatsiyo xua Balaam abe peexanaponaewa xua exanapona icha be ichi xua exanapona pon pematajemabinchi. Daxota Balaam cui matawentsi poxonae ichichipa abe peexanaponaewa.

<sup>17</sup>Barapo pebiwi po pebiwi naerabiya pecuidubi jiwi, jopa yawenaeyo ichamonaetha, icha be feto mene ichi xua weitha bichocono ameneibi xua ba jiwi jopa yawenaetsi. Yawano barapomonae icha be tsaquinaebowa ichi xua ba saya dubenapona xua joibo capana, xua ba cuinaya jopa duneicaeyo, yawano xua ba jiwi jopa yawenaetsi xua peruneicaenexa. Nacom itaweta barapomonae xua barapomonae itawetatsi ichaxota ataya pejinompaenexa peita quirei nacuattha. <sup>18</sup>Barapomonae bichocono atsaca poxonae cueicueije. Yawano barapomonae pia jume, barapo jume jopa jiwi yawenaetsi. Yawano barapomonae naemata jume wunaeya tsipaeba pomonaetha pomonae aena pejume cowantsi jiwi Jesucristo xua barapomonae iru abe peexanaenexa pocotsiwa bequein barapomonae aichaxaibi exana xua jiwi pia cui coyenewa tatsi xua pocotsiwa bayatha copiya exana xua abe. <sup>19</sup>Barapomonae wunaeyo tsimuxu duta ichamonaetha xua ichamonaetha beta pejinompaenexa. Ichitha barapomonae pia coutha exana be pomonae xua caurimonae pia pentacaponaein tatsi amanaya petanacuitsiwatsi. Tsipei daxita jiwi pia cui xeina xua barompaya amanaya tanacuita pontha xua bara copata xua bara juntu coyene itorobatsi. <sup>20</sup>Barapo cae pin nacuathe ichamonaetha jinompa pomonaetha capanenebiyatsi abe pia peexanae cuiru coyenein weya xua po abe peexanae cuiru coyene po cae pin nacuathepiwi exana. Barapomonae baxua exana poxonae jume cowanta Jesucristo, pon jiwi Pecanamataxeinaein, xuano xua pon jiwi Pecapanenebiyaein. Ichitha icha barapomonae equeicha abe exana xuano xua icha awiya exana dubenanaebiya baxuan, bapoxonae barapomonae bichocono abe beyacaincha xua poxonae copiya exana xua pewunaeya poxonae jume cowanta Jesucristo. <sup>21</sup>Icha barapomonae jume cowanta yawano icha penta Nacom peitorobi coyenewa, bapoxonae barapomonae bichocono abe exana Nacomtha. Ichitha icha barapomonae copiyatha jopa jume taetsipae barapo peitorobi coyenewa, bapoxonae barapomonae saya be conotha abe exanaetsipa Nacomtha. Ichitha poxoru barapomonae pejume taexae barapo peitorobi jume yawa pejume cowantsixae, daxota barapomonae Nacom bichocono atene cana exana, beyacaincha xua poxonae jopa jume taeyo barapo diwesi. <sup>22</sup>Barapomonae equeicha caewa yabara jume cuiya exana xua abe exana po coyenein bequein copitha nacui barapenta. Bara barapomonae nacui yabara jume weta xua po tsica diwesiyotha jeye: “Auri ba xua nacabeta iratha equeicha caewa xane. Bequein marrano ba matawainchi pemene itaranae meratha ichitha equeicha caewa nairainyaba xota tsorei”, jei tsica diwesiyo xua Nacom Pejume Diwesitha paeba.

**Meje yabara xua Jesucristo equeicha pia pepatopeicaewa tsica tsane**

**3** <sup>1</sup>Tamonae pam, pomonae tapaca caantobewichi pam, iru painya nejume cowuntsixae Jesucristo. Ainya cartabe pacata tinatsi. Barapo carte, po carte cotacaya tinan xua barapo ainya cartabe. Barapo ainya cartabetha ichipan xua beta painya neyabara nanta xeinaewa tsane pocotsiwan xua paca tsipaebatsi. <sup>2</sup>Pananta xeinare pocotsiwa xua Nacom pia peitorobi jume pepaebiwi paeba poxonae caena bayatha. Yawano jopa pajuntemainaeinde po peitorobi coyenewa naca cuiduba Jesucristo pia peitorobi jiwi tatsi. Barapo peitorobi coyenewa Cristo pon jiwi Pecanamataxeinaein xvano xua pon jiwi Pecapanenebiyaein pia peitorobi coyenewa tatsi.

<sup>3</sup>Copiya matha pananta xeinare xua meje: Pewunaeya poxonae po matabitha Nacom ira weraweraca exanaena, barapo matabitha patsina jiwi xua po jiwi cui capanaena pocotsiwa Nacom pia pejume xainyeiwa tatsi. Barapomonae exanaena pocotsiwa saya ichichipa xua abe exana. <sup>4</sup>Barapomonae yainyabiya jei tsane xua Cristo yabara: “Bapon bayatha paca tsiwuna muxu duta xua equeicha patopaetsica. ¿Eta xua metha awiya bapon pawuna ewatame bara jopa patopeicaeyoba? ¿Incane bapon? Bequein wamo susato jiwi jume cowunta xua pinae bapon patopaetsica ichitha jopa daichiyo beya nama poxonae barapomonae werapa cataunxuae bapon jopa patopaeyo. Bara saya jajupapona wanacuatha xua bapon jopa patopeicaeyo xua poxonae Nacom nacua forota beya anoxuae”, jei tsane barapomonae. <sup>5</sup>Ichitha barapomonae jopa ichipaeyo xua yabara jume jontanaina xua caena bayatha Nacom pepaebixae daxota itaboco ducua xua caena bayatha yawa xua ira exana poxonae mene buxupana weyotsina. Barapo ira Nacom mentha exana. <sup>6</sup>Yawano barapomonae jopa ichipaeyo xua jontanaina xua caena bayatha xua poxonae Noé popona Nacom itoroba pin awubo xua equeicha ira mene buxupana boca yawa xua daxita pocotsiwa barapo iratha weraweraca. <sup>7</sup>Ichitha barapo itaboco xua anoxuae tainchi yawa ira xua ichaxota anoxuae jinompatsi Nacom dubena exana daxita baxuan poxonae Nacom cueicueijeji pia peayapusu itorobi coyenewatha. Nacom baxuan duba beya abu poxonae weraweraca exanaena daxita baxuan pin isototha barapo pia peayapusu itorobi coyenewatha. Baraxuan Nacom weraweraca exanaena daxita poxonae po mataqueitha Nacom yabara paebina daxita jiwi xua penatsicuentisiwa xua abe peexanaexae.

<sup>8</sup>Tamonae pam pomonae tapaca caantobewichi pam, iru painya nejume cowuntsi jiwixae Jesucristo. Jopa pajuntemainaeinde po coyene xua daxita bara Nacom tsita najupatsi pon jiwi Pecanamataxeinaein. Caentacabi tsita najupatsi xua mil po weibe. Matautano mil po weibe

Nacom tsita najupatsi xua caentacabi. Bequein mil po weibe bichocono ainya wei ichitha Nacom saya be tsita caetotsi. <sup>9</sup>Nacom jopa apara bewayo exanaeyo pocotsiwa yabara naca tsiwunae muxu duta bequein ichamonae nanta xeina xua Nacom jopa nainya exaneibiyo. Ichitha Nacom jopa aitaconaeyo daxota paca ewata painya nejume cowuntsinexa. Bapon ichichipa xua dapon aibi tsane pon weraweracaena. Jame Nacom ichichipa xua maisa daxita jiwi peuranexa tsane abe peexanaexae xua icha juntu coyene pexeinaenexa tsane po juntu coyenein xua Nacom tsita xanepanatsi.

<sup>10</sup>Ichitha po mataqueitha pon jiwi Pecanamataxeinaein patopaetsica barapo matabitha jiwi jopa wunae ewatsi tsane. Bapon pon Wanacanamataxeinaein jemeicha patopeicaena icha be ichi pon pecaibin xua poxonae namicha patopa. Peitaboco weraweracaena poxonae pin busi tsurucuae tsane. Jomocoichato, xometono, opiteino, daxita baxuan tautinchi isototha. Yawa barapo ira tautinchi, yawano muxuna tautinchi xua barapo iratha xeina.

<sup>11</sup>Tsipei daxita baxuan tautinchi daxota bewa pajinompaem be pomonae pejuntu coyene xanepanaewi Nacomtha pomonae jopa Nacom tsita xeinaetsi penatsicuentsiwa xua abe peexanaexae. Beta pajinompame icha Nacom ichi xua beta popona. <sup>12</sup>Paeware xua po mataqueitha daxita Nacom wetsina. Yawano paexande pocotsiwa xua yawenatsi xua pepatopeicaewa tsane bichoina barapo matabi. Barapo mataqueitha itaboco tautsina isototha. Jomocoichato, xometono, opiteino, daxita baxuan tautsina pin isototha. <sup>13</sup>Ichitha waxainchi ewatatsi xua Nacom nacata exanaena pena ira yawa pena itaboco xua bayatha Nacom yabara naca tsiwunae muxu duta. Barapo pena ira yawa barapo pena itaboco daxita wunae exanaena pocotsiwa pexainyeiwanexa tsane.

<sup>14</sup>Tamonae pam, pomonae tapaca caantobewichi pam, iru painya nejume cowuntsixae Jesucristo. Paca tsipaebatsi baxua xua daxota poxonae cataunxuae paewatame baxuan, xua pocotsiwa Nacom exanaena bara beta paexande. Bapoxonae Nacom paca caxinaena xua juntepa pajinompame, matautano xua jopa paxeinaem peabe coyenewa painya juntu coyenewatha, yawano xua ichamonae jopa paca yabara paebe tsane xua abe painya neexanaewa. <sup>15</sup>Yawano payaputaneme xua caena bayatha Nacom pon Wanacanamataxeinaein beitatemaya naca ewata xua wajume cowuntsinexa xua pia wanaca capanenebiyaewa tsane. Yawano iru Pablo baxua yabara pacata tina. Bapon Pablo, pon waantobein, pon iru jume cowuntaru Jesucristo. Pablo yaputane exainchi baxuan yabara xua Nacom yaputane exana. <sup>16</sup>Bapon Pablo daxita pia cartantha baxuan yabara paca tsipaeba. Ichitha ichawan daunwei xua painya neyaputaewa. Ichitha pomonae jopa beta peyaputae jiwi iru pomonae pejuntu coyene faefaenaewi Nacomtha, barapomonae seicaya toxeinchiya



exana pocotsiwan xua Pablo paeba. Barichi yabara jume toxeinchiya exana ichawa pocotsiwa Nacom Pejume Diwesitha paeba. Barapomonae pia coutha nanatsiexana xua abe exana xua peweraweracaewa tsane, xua Nacom exanaena.

<sup>17</sup>Tamonae pam, pomonae tapaca caantobewichi pam, iru painya nejume cowuntsixae Jesucristo. Painya neyaputaexae baxuan pewunaeya xua Nacom exanaena baxuan, daxota dota pam pomonae abe pacata necaxanae jiwi xua jopa paca necantacapanaewa tsane. Jopa pacopatsinde xua barapomonae baxua pacata exana xua jopa painya nepentsiwa tsane Nacom. <sup>18</sup>Bichocono pana najuntu wuna exanaponde Wanacanamateaxeinaein pia peantobewathaxae. Jesucristo beta payabara yaputaeponde, pon Wanacacapanenebiyaein. iBarabu bapon ataya xeinaena peainya cui coyenewa anoxuae yawa xua bexa tsaneno! Je bara ichi tsane.

Baja Pedro